

# La nova cussegliera grischuna tar la Pro Helvetia

Promoziun da cultura, mel d'aviuls ed ieli d'ulivas

■ (anr/vi) **Claudia Knapp sesa a partir dal 2012 per la Rumantschia en il cussegl da fundaziun da la Pro Helvetia. Ella è curatura tar la Chesa Planta, viva ad Ardez e fa anc l'apicoltura – e fors era prest ieli d'ulivas en la Liguria.** Il fanadur ha il cussegl federal tschernì nov commembers per il pli aut gremi cultural da la Svizra – per il cussegl da fundaziun da la Pro Helvetia. Enfin uss dumbrava quest gremi 25 persunas. L'entschatta dal 2012 va la nova lescha da promoziun da cultura en vigur e tenor quella dumbra il cussegl da fundaziun mo pli nov cussegliers. 22 cussegliers remettan a la fin da quest onn l'uffizi, tranter quels era *Peter Egloff* che ha represchentà fin uss la Rumantschia. Sulet trais dals cussegliers «vegls» restan pia en il gremi empitschnì e sis novs sa mettan ensemen cun *Claudia Knapp* a la lavur.

## Redactura, hoteliera, apicoltura

«I fa plaschair ed è ina onur», di Knapp davart sia elecziun. «La promoziun da cultura è impurtantissima, pertge la cultura è quai che fa ora l'uman. L'impurtanza da la cultura vegn sutvalitada ozendi, cunzunt da las forzas fermas da l'economia.» Ella n'haja betg stuì ponderar ditg, cura ch'ins haja dumandà, sch'ella avess interess. Sco commembra dal cussegl da fundaziun vegnia ella a stuair observar la scena culturala da l'entira Svizra, ma quai fetschia ella gea gia uss, di Knapp a l'anr. Il settember inscuntra ella per l'emprima giada ils auters commembers dal nov cussegl da fundaziun. Fin uss n'enconuscha Knapp anc nagins d'els.

Il num da Claudia Knapp han ins dudì ils ultims onns en connex cun la Chesa Planta, nua ch'ella lavura sco curatura cun la finamira da stgaffir in center cultural da muntada surregiuna-



**Claudia Knapp (55 onns) è curatura en la Chesa Planta a Samedan. Ella viva ad Ardez e fa era l'apicoltura.**

MAD

la. Avant è ella stada assistenta dal sculpturist ed artist *Not Vital*. Ma la dunna da cultura ha era rimnà experientschas en auters secturs: Dal 1999 fin il 2004 ha ella manà sco directura ensemen cun *Annalisa Zumthor* il hotel termal en Val S. Pieder. Avant è ella stada 13 onns moderatura e redactura – l'emprim tar la Televisiun Rumantscha e lura tar la «Rundschau». Suenter il studi aveva Knapp plinavant manà per dus onns ina galaria a Cuira ed aveva exponì oravant tut art contemporan american e svizzer.

## Pro Helvetia e Liguria

Da preschent abitescha Knapp ad Ardez, nua ch'ella fa dasperas anc in zichel l'apicoltura. Il mel da ses avieuls ha num «Grand Cru d'Ardez». Ma l'apicoltura e dunna da cultura ha gia novs plans. En la Liguria vul ella acquistar ina chasa ed in pau funs cun var 60 ulivers – uschia ch'ella vegn proximamain er ad imprend-der tge ch'i dovra tut per pressar bun ieli d'ulivas.

Ils novs plans sa laschian cumbinar bain cun l'incumbensa tar la Pro Helvetia, manegia Knapp. Il cussegl da funda-

ziun vegnia ad avoir var sis sesidas ad onn e per mintga sesida impundian ins dus u trais dis da preparaziun.

## Cumissiu cun 13 experts

Il nov cussegl da fundaziun sa concentrescha en l'avegnir sin la strategia per la Pro Helvetia. El n'examinescha betg pli sez las dumondas per projects. Quellas vegnian tractadas a partir dal 2012 d'ina gruppa da 13 experts, respunda il directur da la Pro Helvetia *Pius Knüsel* sin in e-mail da l'anr. Per questa gruppa tshertgian ins experts per ils gronds

secturs culturals, nua ch'ins examine-schia las pli bleras dumondas.

La Pro Helvetia haja mo radund 10 dossiers ad onn, nua ch'i basegna cum-petenzas rumantschas, scriva Knüsel. Perquai na dovrian ins betg aposta in expert rumantsch. «Ma i fiss pussaivel ch'in Rumantsch sesa er en la gruppa d'experts, betg per dumondas davart la Rumantschia, mabain sco specialist da musica u art.»

Sper la gruppa d'experts dovria la Pro Helvetia dentant anc 15 specialists independents per secturs pitschens e tranter quels sa chattia lura er in specialist rumantsch, scriva Knüsel. La tscherna dals 13 experts e dals 15 specialists vegnia fatga l'onn proxim dal nov cussegl da fundaziun.

## 3300 dumondas per agid finanziel

La Pro Helvetia retschaiva ad onn radund 34 milliuns francs da la confederaziun. 25 milliuns distribuescha la Pro Helvetia per projects culturals – 43 pertschient en Svizra, 57 pertschient en l'exteriur.

La fundaziun per la cultura svizra survegn mintg'onn radund 3300 dumondas per sustegnair projects en tuttas spartas. A la mesadad da questas dumondas po la Pro Helvetia dar suatientscha e conceda summas tranter 500 e 300 000 francs per gidar a realisar projects culturals.

La fundaziun da cultura vegn administrada cun 66 plazzas cumplainas, da quellas sa chattan 25 en l'exteriur.